

摩鄧女經

後漢三藏法師安世高譯

聞如是一時佛在舍衛國祇樹給孤獨園時
阿難持鉢行乞食食已阿難隨水邊而行見
一女人在水邊擔水而去阿難從女乞水女
即與水女便隨阿難視阿難所止處女歸告
其母母名摩鄧女於家委地卧而啼母問女
何爲悲啼女言母欲嫁我者莫與他人我於
水邊見一沙門從我乞水我隨問名名曰阿
難我得阿難乃嫁母不得者我不嫁也母出
行問阿難阿難者承事佛母已知還告女言
阿難事佛道不肯爲汝作夫女啼不飲食言
母能知盡道母出請阿難歸飯女大喜母語
阿難我女欲爲卿作妻阿難言我持戒不畜
妻復言我女不得卿爲夫者便自殺阿難言

我師佛不得與女人共交通母入語女阿難
不肯爲汝作夫言其有經道者不得畜婦女
對母啼言母道所在母言天下道無有能過
佛道及阿羅漢道摩鄧女復言但爲我閉門
戶無令得出暮自當爲我作夫母閉門以蠱
道縛阿難至晡時母爲女布席卧處女大喜
自莊飾阿難不肯前就卧處母令中庭地出
火前牽阿難衣語阿難言汝不爲我女作夫
我擲汝火中阿難自鄙爲佛作沙門今日反
在是中不能得出佛即持神心知阿難阿難
還至佛所白言我昨日行乞食於水邊見一
女人我從乞水我還到佛所明日有一女人
名摩鄧請我欲得歸飯我出便牽我欲持女
與我作妻我言我持佛戒不得畜妻女見阿
難得脫去於家啼哭母言其有事佛者我道

不能勝我本不語汝耶女啼不止續念阿難
 女明日自行求索阿難復見阿難行乞食隨
 阿難背後視阿難足視阿難面阿難慚而避
 之女復隨不止阿難還歸佛所女守門阿難
 不出女啼而去阿難前白佛摩鄧女今日復
 隨我佛使追呼摩鄧女見之佛問汝追逐阿
 難何等索女言我聞阿難無婦我又無夫我
 欲爲阿難作婦也佛告女言阿難沙門無髮
 汝有髮汝寧能剃汝頭髮不我使阿難爲汝
 作夫女言我能剃頭髮佛言歸報汝母剃頭
 髮來女歸到母所言母不能爲我致阿難佛
 言剃汝頭髮來我使阿難爲汝作夫母言子
 我生汝護汝頭髮汝何爲欲爲沙門作婦國
 中有大豪富家我自能嫁汝與之女言我生
 死當爲阿難作婦母言汝何爲辱我種女言

母愛我者當隨我心所喜母啼泣下刀剃女
 頭髮女還到佛所言我已剃頭髮佛言汝愛
 阿難何等女言我愛阿難眼愛阿難鼻愛阿
 難口愛阿難耳愛阿難聲愛阿難行步佛言
 眼中但有淚鼻中但有涕口中但有唾耳中
 但有垢身中但有屎尿臭處不淨其有夫妻
 者便有惡露惡露中便生子已有子便有死
 亡已有死亡便有哭泣於是身有何益女即
 自思念身中惡露便自正心即得阿羅漢道
 佛知女已得阿羅漢道佛即告女言汝起至
 阿難所女即慚而低頭長跪於佛前言實愚
 癡故逐阿難耳今我心已開如冥中有燈火
 如人乘船船壞依岸如盲人得扶如老人持
 杖行今佛與我道令我心開如是諸比丘俱
 問佛是女人母作蠱道何因緣是女得阿羅

漢道佛告諸比丘汝欲聞知是女不諸比丘
言我曹當受教佛言是摩鄧女先世時五百
世爲阿難作婦五百世中常相敬相重相貪
相愛同於我經戒中得道於今夫妻相見如
兄如弟如是佛道何用不爲佛說是經諸比
丘聞皆歡喜

摩鄧女經